



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10

Nicolas Maduro sorkar anemer nisung 75 takum samaogo

TAPAK 9

Ram Nath Kovind-i Tir election atema tenung agütsüogo

VOL. XIV NO. 246 (ADOK 246)

DIMAPUR

SATURDAY

JUNE 24, 2017

5.00

Dmr nung Deobar nikongdang dokantem lapoktsü

Dimapur, June 23 (TYO): Eid benjung atema customer tem yaritsü atema June 25, 2017 nikongdang 1:00 ako nungi DMC telongtet nung dokantem lapoktsü temelaba agütsür ta Dimapur Municipal Council,

Administrator Moa Sangtam-i sangdong ka nung metetdaksü. DMC telongtet kübok workshop aser industries dak alaka dokan kibur ajak nem iba osang sangoktsür, ta paisa shisem.

NDA den tesendaktep ayuba atema NPCC-i ashishitsü makok: NPF

Dimapur, June 23 (TYO): NPCC Tir, K Therie-i NPF Tir aser Nagaland Chief Minister, Dr. Shürhozelie Liezietsu tanen makai aitsüba ajanga pai kechi shinür ta Naga People's Front (NPF)-i kanga rataa bilemer, ta tanü NPF Central Office, Media & Press Bureau-i sangdong ka nung metetdaksü.

sangdong nungsa shia lir. "1977 nungi mesüra BJP medentetdang yongi NPF ya Congress masüba national party den teloktep liasü ta NPCC Tiri kanga junga meteta lir, aser 2003 küm tetenzüklen Congress den madenba yimtenren party temi DAN tentetba mapang nung iba teloktep ya asentenshi aser tashi itshi," ta NPF-isa metetdaksü.

"NPF-i NDA den mesüra Centre nung tanga party den tesendaktep ayutsü telemtetba agiba nung NPCC aser parnok Tiri nemnemtsü mesüra tasüngdangba akatsü atema parnok dak temeten mali. NPF-i aniba DAN sorkari taruba Tir election nung candidate kar pusemstsü mesüra pu-masemstsü ta ashiba onük nung tasüngdangba akatsü atema Therie dak temeten khenyongi mali. Kar Tir candidate pusemstsü atema NPF-i NPCC dang nungi temelaba menüngdaker," ta NPF

"Therie ya mapang ka nungbo NPF-i aniba DAN sorkar nung Minister liasü, aser pai NPF party indang tangatetbatem meteta lir, ajisüaaka tangbo pai Tir election nung NPF-i shiba yaritsüar, iba telemtetbaji agitsütsü meranger. Yamaji inyaksü agibo, Therie-i Tir election atema par party-ia kechi inyaktet, iba nungji dang rangloker inyaksüla," NPF Media & Press Bureau sangdong nung metetdaksü.

(Maneni tapak 12 nung...)

Dimapur nung 'Sanitation Campaign' tenzük

Dimapur, June 23 (TYO): Hokolbarnü Dimapur nung Soil & Water Conservation Department-i teyari agüja Group for Environment Management and Services (GEMS) ta ser mulungtet telok kati "Sanitation Campaign" ka tenzük.

tenzük aser tongti tesemdangerji Soil & Water Conservation Director, Imkongneken Ao liasü.

Iba sentong ya Sangpangtu colony, United North Block - B, Burma Camp, Dimapur nung

Sentong nung GEMS tir Impa Longkumer, Ministry of Micro, Small & Medium Enterprises, Govt. of India Deputy Director Er. Tali Longchar aser Soil & Water Conservation Assistant Engineer Er. Intiwati Jamir nungertem aden aser parnoki Sangpangtu colony nung alirtem dang solid waste management indang tesayuba balala lemsatetp.

S&WC Director, Imkongneken Ao ya solid waste management nung aika ajangshia aruba nisung ka lir aser Nagaland nung vermicomposting tenzükler rongnung pa da lir. Tanü sentong nung pai jana timi anepalutsü indang tayongzükba agütsü.

Dimapur ama jila nung Municipal (urban) solid waste (MSW) ji ali nung endoker saka iba inyakyim ya tzümpung atema majung lir. Anungji, asenoki tzümpung memenentsü atema jana mashi meindoktsüla, ta pai ashi.

(Maneni tapak 11 nung...)

Shürho-o Solo tepsetba anema Kohima nung lungkak ait



June 23, 2017 nü Kohima nung asür Shurho-o Solo tepsetba anema lungkak aitba sentong agiba noksa nung angur.

Dimapur, June 23 (TYO): Asür, Shürho-o Solo tepsetba nung temulung melemi, iba tatalokba tekaratiba nung bushisüngdangtsü atema takhangba agüja tanü Kohima nung nisung meyirjang aika adenshia longkak aitogo.

June 18, 2017 aonung asür Shürho-o Solo tasümgaji Kisama nung Garo morung kima angu, ta osang angazükler.

Longkak aitba sentong ya Kohima Village kübok Tsütuonuomia Khel Council-i ayongzükba liasü, aser kin balalai iba sentong pusema state yimtiba nung T Khel ground nungi DC Office tashi longkak aita jaja.

Iba sülen Kohima DC nem tezüluba nung temepishiba onük ka agütsü, iba shidi nung T Khel Council-i, "June 18 aonung ozü züngsem aser Kuozhü (Ne

Minister's Hill) Kohima nung alir asür, Shurho-o Sebastian Solo tasümgang Kisama nung angu, aser pa tenaba tabelen zübo keter liasü, aser ibaji alangba agi masü saka hadir kari yirutsüba südi ta onoki temulung melemi bilemer," ta shia lir.

"Paji nisung kari tepsetba asütsü akok ta onoki mulung malemer," ta parnokisa ashi.

Iba dak sendakba nung Khuzama Police Station nung ken o ka benoka lir, aser iba tatalokba bushisüngdangdar, ta osang angazükler.

Council-isa ashiba agi, iba aonungji Shürho-o den par medemer pezü party liasü, aser parnokji Neise-o Zashümo aser pa kinüngtsü Tanuo, Tseilie Zashümo aser Menuovi Zashümo nung liasü, aser parnok ajak iba

tesem nungji liasü.

Council-isa Deputy Commissioner dang police-i bushisüngdangba maparen tembanga ochi jungkai adokjang aser tekaraba nung aibelenerji puang, ta takhangba agütsü.

Ano külen Deputy Commissioner, Rajesh Soundararajan-ia asür kibong den mangyim tejashi lemsatetba den külemi administration aser police-i tekaratiba nung bushisüngdangtsü ta metetdaksü.

Kohima SP, Vekhosa Chakhesang-ia council dang, temulung melemi alir ajak, talisa par medemer pezüji June 21 nungi ghonda 72 police ket nung lir, aser ochi jungkai adoktsü atema jungjunga bushisüngdangdar, ta metetdaksü.

NSCN/GPRN-i 4 lane lenmang atema jangjashitsür

Dimapur, June 23 (TYO): nung shia lir.

Ajisüaaka, June 17, 2017 nü Nagalim nung terenlok mapa inyakbatem ajak Naga nung ajangzüktsü atema jungjunga inyakdaksütsü tangatetba nung NSCN/GPRN-i mapa inyakba ajak mita repranger aser iba nungji Dimapur aser Kohima tsüngda 4 Lane Road dena lir, ta MIP sangdong ka nung metetdaksü.

Mapang shia, NSCN-i ECI aser Maytas Gayatri dang mapa jungjunga inyaksü aser mapang lateta aliba tsüngda mapa tembangtsü atema nenshia metetdakja arur. Tang teinyakdak mapa nunga local aayangertem aser mapa inyakertem nem inyakdakang ta parnok nem tetuyuba agütsüogo, ta MIP-isa ashi.

June 16, 2017 nü 4 lane mapa inyakba anenogo ta osang angazük aser iba jagi NSCN/GPRN ketdangsertemi Engineer tem dang kechiba mapa meinyaker ta asüngdang. Idangji parnoki tzünglu aruba ajanga mapa inyakba anen ta langzüa liasü, ta MIP sangdong

social media aser print media nung mapa anenbaji NSCN-i timtem agütsüba ajanga lir ta osang prokshitsü tenzük.

ACAUT aser KK Sema o Joel Rengma nungertemi NSCN dak tai tongloktsü aser Nagaland Angh, Padmanabhaiah B. Acharya-ia Delhi tashi oa Union Home Minister, Rajnath Singh den iba onük lemsatetp. Yamaji lia, ACAUT-i NSCN/GPRN nem anogo asemnü tsüngda telangzüba agütsütsü atema mapang züngzüktsü, ta parnokisa metetdaksü.

Iba atema NSCN-i NCSU den osang agitep aser iba mapang parnok sasep nung "communication gap" ajanga iba onük adok aser tasüngji osangkakettem nung jangjashitsütsü ta ashi. Ajisüaaka, NCSU-i ashiba tasüngji maru aser Media o Social Media tem nung NSCN/GPRN dak tai tongloktsüba manen, ta MIP-isa metetdaksü.

Tatem nung June 21, 2017 nü Kilo Kilonser, Hukavi Yephthomi-i NCSU tir Pele jaok aser asüngdangya asüdag, Pele-i pa indang works Supervisor inyaksü atema Unification Camp (GPRN/NSCN) nung Deputy Kilonser, Neibu Angami nübo amshir ta nangzük.

NSCN/GPRN dak tiyazü nung tai tongloktsüba atema pai media tem dang osang jangjashitsütsü ta ashi, saka NCSU-i June 23, 2017 adok osangkakettem nung June 22 nungi mapa inyaksü atema tenangzükba agitep ta-ang osang adokbaji tesüngmangtsüka lir, ta MIP sangdong nungsa ashi.

Dimapur aser Kohima tsüngda 4 Lane lenmang yangluba mapa anenbaji NCSU sasep nung mangatetep aliba ajanga liasü. Anungji, public-i iba onük angatetsü aser tiyazü nung NSCN/GPRN dak tai metongloktsütsü atema mepishir, ta MIP sangdong nungsa metetdaksüogo.

**NÜ VOTE AGI NAI
AGINÜBA AMA NÜ
TAKÜM
YANGLUTSÜSA
NÜ NEM TASHI
AGÜTSÜR**



Horticulture Crops indang anogo 5 nü training tembangogo



West Garo Hills, Meghalaya nung June 19 nungi June 23 nü tashi anogo pongunü aluyimertem Training sentong nung shisalen sayurtem aser training agirtemi Meghalaya nung aliba Snamrik Club züngsemtem den külemi tangokba noksa ka angur.

Dimapur, June 23 (TYO): West Garo Hills, Meghalaya nung June 19 nungi June 23, 2017 nü tashi anogo pongunü aluyimertem Training sentong takok ngua tembangogo.

Iba training ya Snamrik Club, Tura (Megalaya) aser Central Institute of Horticulture (CIH), Medziphema nati senteper ayongzükba liasü.

Iba training nung yimtsüng balala nungi aluyimer 250 shi shilem agia aden.

Central Institute of Horticulture (CIH) Medziphema nungi Kr. Shisarenla-i Institute-i inyakba mapatem metetdaksüba den külemi

aluyimertem dang iba Institute-i agütsüba training course balala agütsü atema aluyimertem ayongzükba liasü.

Ano Nagaland nungisa Senti Longchar (DK), Horticulture Officer-i Naga Mircha (Raja Mircha) lu ayimba indang onük tasen ka jembia liasü.

ADO, Daddenggre (Hq), Apurba Hajong-i bengana, Capsicum tsünüba indang tasa aser titidong nungi süngsem agizüka metsüh yangluba tasatem (softwood grafting techniques) sayua liasü.

Ano Daddenggre C&RD Block nungisa shisalen sayur ka tenüing agi, Lunathone Marak-

ia sobaliba süngjanglijangtem aser iba ajanga tajangzüktem indang jembia.

ADO Gasuapara C&RD Block, Walseng Sangma-i yimtsüngtem nung konger lu yima senotsü ajangzüktsü indang tesayuba agüja liasü.

Greatush M Marak, (M.Sc. Agri)-ia yimtsüngtem nung pei kima atsü lu ayimba indang jembia liasü.

Iba sentong tatembangbuba anogo nung shilem agir aluyimertem nem certificates lema agütsü aser Snamrik Club nungi Torang-i tepela anküp o jembia training takokma nung tembangogo.

AR-i Darogapathar nung prangpong shibelener ka apu

Dimapur, June 23 (TYO): Prangpong shibelena ayokba osang ka angazükba sülen HQ IGAR (North) kübok 32 Assam Rifles sepaitem den police züngsemtemi June 22, 2017 nü Darogapathar, Dimapur mita ao, ta Assam Rifles sangdong ka nung

metetdaksü.

Mita aoba mapang nung 32 Assam Rifles sepaitemi nisung ka ket nungi Pt 32 mm Pistol ka apu. Iba nisungbaji Darogapathar, Dimapur nung alir arishi küm 30, K Arkha Achumi lir ta jangjaogo, aser pai-a pai prangpong shibelena

telungpur telok balala nem agütsüba nangzükogo, ta sangdong nungsa shia alir.

Maneni bushisingdangtsü atema tang pua alisang den pa ket nungi anguba pistol ji East Police Station, Dimapur ket nung agütsüogo, ta Assam Rifles-isa metetdaksü.

Gangtok, Aizawl, Pasighat Smart Cities nung züngoksemogo

Gangtok June 23 (Agencies): Smart city plan kübok yimti tasen 30 shimba nung Pasighat, Aizawl aser Gangtok yimtitema züngoksemogo.

Sorkari yimtitem list ya Hokolbarnü sangdonga liasü aser item rongnungi yimti 30 shimtet. Tang shimba yimtitem ajanga Smart City Mission kübok yimti ajak agi 90 kümogo.

Tanü sangdongba yimtitem rongnung Kerala yimtiba, Thiruvananthapuram temaba jenjang nung liasü aser Chhattisgarh yimtiba (tasenba)

Naya Raipur tanabuba jenjang nung liasü.

Uttarakhand yimtiba, Dehradun-a taküm bo iba list nung züngsemogo.

Mumbai iba tetoktepa nung shilem magi. Shimtetba yimtitem tenüngtemji Union urban development minister M Venkaiah Naidu-i sangdong.

Centre sorkari yimti 40 bo sangdongtsü asoshi imlaa liasü saka Bengal aser Mumbai nati shilem magiba ajanga yimtitem tajemba aküm aser iba den külemi yimti kar municipal body-i asadanga mapang

minimum qualifying mark mongutetba ajanga parnok züngtoktsüsa aküm.

Naidu-i ashiba agi, smart city 40 shimtsü atema yimti 45 toktepa liasü saka item rongnungi yimti 30 dang shimtet. Ajisüaka taküma Meghalaya yimtiba Shillong iba list nung mezüngok. Tanü sangdongba yimti 30 nung smart city sentongtem kübok sen crore 57,393 intoktsü.

Naidu-isa, smart city mission kübok tanünga smart city 10 atema city 20 tokteptsü, ta metetdaksü.



June 19 nungi tenzüka anogo pungu nü tashi Mokokchung district kübok sub-division-tem asoshi alima lendong balala atalokdang koda nüburtemi langzüksütsü ta asüba 'Community First Responder' (CFR) training takok ngua tembanger kübok shilem agirtem, district administration aser DDMA ketdangsurtem külemi tangokba noksa nung angur. Iba sentong ya Nagaland State Disaster Management Authority-i nungita HG, CD aser SDRF den külem sür District Disaster Management Authority Mokokchung-i ayongzükba liasü. Mokokchung, June 23, 2017

Delhi Ao Kaketshir Telongjem sangdong

Dimapur/New Delhi, June 23 (TYO): Aoeer shisaluymier shirnoksa University of Delhi, New Delhi nung Undergraduate Degree Subject balala nung agütsü janrar, Delhi Ao Kaketshir Telongjem ajanga admission inyakyim nung teyari agütsütsü, ta tanü Delhi Ao Kaketshir Telongjem-i sangdong ka nung metetdaksü.

Mezüng merit list June 24, 2017 nung adoka alitsü,

anungji metetpelatsü atema aguja aliba number nung tongteprateptsü metetdaksür, ta sangdong nungsa shia lir.

Tongteprateptsü:

Yarden Jamir (President) : +91 9582678377

Tiamongla Imchen (General Secretary) : +91 9599160772.

T o n g p a n g k o k b a

(Asst.Information Secretary)

:+91 8527062864
Sentinaro (Asst. Cultural Secretary) :+91 9643744551

Dimapur nung Bharat Scouts & Guides nung Vice Presidents shim



June 23, 2017 nü DC's conference Hall nung Bharat Scouts & Guides, Dimapur induction sentong nung Dimapur DC aser tangartem tangokba noksa nung angur. (DPRO, Dimapur)

Dimapur, June 23 (TYO): June 23, 2017 nü Dimapur DC's conference Hall nung Bharat Scouts & Guides Dimapur District nung vice presidents shimba sentong agi, aser iba sentong ya Dimapur Deputy Commissioner aser Bharat Scouts & Guides Association Dimapur, President, Kesonyu Yhome leniba nung agi.

Tang tasen shimba vice presidents rongnung ADC, Dimapur, Sara Jamir, CEO, DMC, Dimapur, Moa Sangtam

asere SDO (c) Zakabo Rotokha nunger densema lir.

Vice president asempronglai parnok nem iba akhüm agütsüba atema pelaba lemsatepba den külemi nüburtem tenzüka mapa nung akokba tashi yaria amalitepa inyaksü, ta metetdaksü.

Induction ceremony ya Dimapur, President, Kesonyu DOC (S), D. M Agay Joseph-i ketdangtsüa agi, aser DOC (G), Kevileno Haikam-i Bharat Scouts & Guides indang nung ajemdaker onük tatsüka jembia liasü.

Manipur nung Home Guards-i longkak ait

Imphal, June 23 (Agencies): Manipur nung Home Guard tem itasen aser increment tem dak sendakba nung March 11, 2015 nü Supreme Court-i tetuyuba agütsüba ama mesüi state sorkari maparen kanga atsüdaka mezülongi inyakba anema tanü nungi tenzüka mapang telatet ka makai longkak aitba sentong ka Home Guard tem-i tenzüko.

Manipur Home Guards' Welfare Organisation (MHGWO)-i state sorkar dang SC-i 2015 March 11 nü tetuyuba agütsüba mapa küma inyaksü asoshi khangogo. Supreme Court tetuyuba nungji ashiba agi, State sorkartemi home guards indang duty allowance rates ji police constable ka minimum monthly pay den kasa asütsüla.

Iba tetuyuba ya ita asem tsüngda nung mapa küm inyaksü asoshi metetdaksü. Iba dak sendakba nung Manipur High court-ia taküm January 12 nü ita asem tsüngda SC-i tetuyuba agütsüba mapa küma inyaksü asoshi Manipur sorkar nem tetuyuba agütsüogo.

Ajisüaka Manipur sorkari tang tashi okadak nungi tetuyuba agütsüba mapa küma meinyaker

ta Home Guard züngsemtemi ashi. Manipur Home Guard Employees Welfare Association (MHGEWA) lenisüba kübok mapang telatetka makai parnok tanü nungi mapai maor.

Home guard association-i SC tetuyuba mapa küma inyadaksütsü asoshi 2015 April 1 nü nungi tenzüka ajungshiyonga arudar.

Iba longkak aitba maparen tenzüka sayua home guard temi Imphal yimti süa rally ka ayongzükba akaba sülen Imphal Keishampat Junction nung mener longkak ait.

Iba rally ya Lamphel nung Home Guard headquarters nungi tenzüka aser Keishampat Junction nung tembang, kong parnoki mener longkak aita liasü.

Parnoki iba sentong nung placard nung oren balala zülur sayua liasü.

Longkak aitba tesem nung osangbenertem den jembidang Manipur Home Guard Employees Welfare Association general secretary, Kh Inaobi Devi-i ashiba agi, state sorkari parnok takhangba mataloktsüra home guard temi longkak aitba yinya balala nung longkak aittsü.

Tang Manipur nung Home Guards 2158 lir.

> GST ASOSHI RENEMA LIANG >>



GST July 1, 2017 nung tenzüksü

Saru agütsütsüpur tasentem aser tang saru tagütsüdakpur tesem melenshitsüba atema registration 2017 June 25 nungi tenzüksü.



GST KÜBOK SARU AGÜTSÜTSÜPUR TASENTEM ATEMA REGISTRATION:

- GST kübok registration tasen agitsüpurtemi 2017 June 25 nungi tenzüksü application agütsütettsü.
- Register agitsüba latettsüba anogo nungi tenzüksü ita ka tsüngda nung registration atema application tem agütsütettsü.
- Saru agütsütsüpurtem 2017 July 1 nungi tenzüksü GST portal nung 2017 July 31 tashi nung registration application agütsütettsü.
- Registration tasen agitsüba atema mapang peria lir.

VAT, SERVICE TAX ASER CENTRAL SARU AGÜTSÜTSÜPURTEM MIGRATION

- Provisional ID koba 'RC cancelled' ta sayuba ajanga migrate asütsü atema mamshiteti liasü, item ajak reactivate sütsüogo. Yimlibilema 2017 June 25 nungi GST Portal nung enroll asütsü atema iba ya amshiang. Enroll asüba sülen registration form submit asütsü atema nai ita asem angutsü.
- Certificate of registration (GSTIN) agütsüba matai Migrate asür saru agütsürtemi 2017 July 1 nungi tenzüksü ita asem parnok shishilembaba mapa inyaka atatsü atema enrolled süa aliba provisional ID ji GSTIN ama amshia litettsü.
- Saru agütsür shirnoki 2017 June ita nung Central Excise aser Service tax registration agizükogo, parnok nem 2017 July ita mezüng hopta nung provisional ID agütsütsü.





TIR YIMYIM YIMOBILEM (EDITORIAL)

DIMAPUR SATURDAY, JUNE 24, 2017

NOTA

- P. Among Aier

Sangküm küm tetenzüklen Nagaland assembly elections agitsü aliba dak rangloker arogotemi anir loktitentet aikati 'Clean Election' dak sendakba sentong aser maparen balala kanga meranga agiyonga arudar. Anogoshia 'Clean Election' indang osang prokshir aser osangkakettem nunga asenoki iba onük indang teti azünger. Atangji, asen state nung ochimashi agi sünger, asenok tangoa junga mesashitetsüsa tensa talenba nungi salatsü aser alar tia nungi nüjiba dangi arua, asen lima nung asenok kibur ama alitsü asoshi election merükteta agia sorkar tajung kümteter state len anidaksütsü tangatetba nung Nagaland Baptist Churches Council (NBCC)-i ketdangsüa Nagaland ajungalen 'Clean Election' mapa inyaker. Iba mapa atema ABAM-ia Mokochung district nung aliba Ao Arogotem zone wise lemsar Clean Election sentongtem agiogo aser ano Mokochung adena orr aliba arogotem nunga iba sentong ayongzüka agiogo. Maneni loktitentet balalai 'Clean Election' dak sendakba pei pei sabang nung ayongzüka agidar. NBCC ketdangsüba kübok ABAM-i Aor arogotem ajak nung 'Clean Election pledge card' lema agütsüogo aser nisung aikati iba nung pei tenüng zülua tenangzüka agiogo. Ajisüaka, ano nisung karbo 'pledge card' nung sign asütsü atema arentaka bilema alitsü akok. 'Ozü constituency nung tokteper candidate tem rongnung ka danga shimtsüsa nübo mali nungbo ni shiba nem vote agütsütsü?' mesüra 'Ni politics mejangrar, anungji Clean Election tenangzüka nung jiang sign mesüli' mesüra 'Election paiben agia aruyonga, ni mejangrarji, ni khen danga kü vote magütsüdang, taji Clean Election mapaji pusemer, saka tenangzüka jiang kecha magishili' mesüra 'Ni süpokrem-a magir, vote-a magütsür, taji Clean election tenangzüka nung sign masütsü' ta tebilemba balala ajanga 'Clean Election' indang tenangzüka magibapurtema aika alitsüa akok. Ajisüaka, asenoki angatetsüba kaji, asenok Khristan tajung ka ama aser iba tangatetba nung pei arogo nung züngsem tajung ka ama arogo dak sendakba mapa ajak nung shilem tajung agir aser agitsü meranger. Iba denji saku, alima nung alir asünung, asenoki yimten yimsüsüba aser sorkar maparen nungjia, ochishia shilem tajung agitsüla. Nai nü indang vote magütsübaji kecha masü ta bilemya alitsü akok saka sorkar akümba inyakyim nung nai nü teinyaktsü tongti ka meinyakba lir. Nai nü indang vote ji magütsüyonga, shibai metet vote agütsüba anogo nung tangar kari nü indang vote ji agütsüdar asütsü akok aser ibaji kangasa tezütangtsüka lir. Nai politics mejangraba agi nai nü vote magütsüdangi aruya alitsü akok mesüra election nung candidate tem dak temulung masüba agi, nai nü vote agütsütsü atema polling station-i maoer asütsü akok. Ajisüaka, osang tajung ka lir aser ibaji India nung 'negative voting' ta ser inyakyim ka tenzüka lir. Iba ya election mejangrartem mesüra candidate/party mesaklokertem nem temeten agütsüba inyakyim tajung ka lir. Iba inyakyim dang 'None of The Above' (NOTA) ta ajar aser iba ya 2013 küm Supreme Court-i People's Union for Civil Liberties versus Union of India tsüngda ken o angadanga sülen tetuyuba agütsüba nung ajemdaker tenzüka lir. 2013 küm NOTA ya Chhattisgarh, Mizoram, Rajasthan aser Madhya Pradesh aser Delhi elections nung mezüng amshi aser 2016 Assembly elections nungbo NOTA nung vote agütsütsü atema nisungtemi kanga ajungmesotepa liasü. Yaküm assembly election mapang Kerala nung tetsür telok kati nübertem dang candidate tem rongnung tetsür ka danga medenra, NOTA nung vote enokjang ta tayongzüka agütsü aser külen Tamil Nadu nunga lanur telok kati ochimashi anema nokdaker ta sayua NOTA nung vote enokjang ta tayongzüka agüja sentongtem ayongzüka agiogo. Anungji, asenok nem iba temeten agüja lir asünung, nai kecha marentaki 'Clean Election pledge card' nungji Tsüngrem tenüng nung sign süangma aser election agiba anogo nung, nai polling station-i orr NOTA nungji nü indang vote enokjangma. Na, politics mejangraba nisung ka asütsü akok mesüra nür constituency nung nai saklokba candidate mesüra yimten telok ka danga malitsü akok saka nai senso tajung ka ama aser alima yimten mapa nung ochishia shilem agitsü ta tangatetba nung, 'temalen agüja alirtem shinga nema vote magütsür' ta ochishia NOTA nungji nü senti vote enoktsüra, ibaji nai 'Clean Election' mapa nung shilem tajung agibaji asütsü.

OLEMSABANG

OKILA

- I. Shilu Yaden, Sangtemla Ward, Mokochung

1. OKILA:

Ochi o aser mapa ya kanga tashi tait, ochi shisatsü aser tanüla aketba dakji alima nung nübur ajaki temulung alemer aser pelar. Nübur pelaba jaki pa taküm nunga azükaru aser pelaa alir. Ochi aketba nübu jaki nübur kodanga mashioktsür, aser mekülakoktsür. Ochi jagi kin ka jenjang ajungketer aser temoatsü anguba kin ka jenjang ajungketer aser temoatsü anguba kin asür.

Tiyazü o aser mapa jaki nübur ashioktsür aser jenjang telongi ludaktsür. Kechiyong iba kin aser nübur dakji temulung malemer aser kechisarina nung tamang makar. Anungji shiba aser koba kin ochi nung lir, nübur ajak tajangzük angur aser pelar. Iba kinji jenjang temaba nung ajungketer. Ochi jembir aser ochi mapa inyaker tsüngdang nüburia tiazü mejembiteter aser Tsüngremia pelar. Item asoshi kechisarina nung tajangzük alir. Anungji ochi ya kanga tashi tait ta angatetdi.

2. AKHI PUTU NUNG: -

Oboula nunger Putu nung ochi dang jembi aser inyak. Ochi mashir oji lokti aser pei saseb nung menüdong o dang liasü. Akümüliwa tangari mesükshi, aser tasü lima nunga Meyitsüngba tsüngrem (asür o bendangba tsüngrem) tsüngdang sentsü dong nung indang indanga metsüngshir, aser Meyitsüngba tsüngremi shir akümüliwa ochi mashi mapa inyak ajak sadakjema angur aser Molumi (tamajungba lenmangi) yoker ta oboula nungeri amang. Anungji parnoki kanga tsübo aser akümüliwa ochi jembia ali. Khristan yimsü marudanga oboula nunger tamangbaji kanga akanga liasü. Küm nung koba mapang nung kechi tsüngrem külemtsü tim, shitak nung maka-mait asüyonga mapang shitak nung par tsüngrem külem. Tatishitsü agi Alu tsüngrem külemtsü mapang shitak nung entsü pei kidang melira tanga kidang memeshi, saka Entsü melen ali chipo raksa (pokok) tila ka bener oa alu tsüngrem dang ochishia ozü kidang Entsü maliji ya asüyonga agizükang ni! ta shir Apuzüng nung tsüngzützü oset den külemi toktsü. Ochi mulungsentsü agi par tsüngrem külem nungji tekülemji agizük aser alu nung tsüksüng-ongsüng südaktsü. Kima yimdong osettsüset onshia akayonga jia tanur dang aji kibur lirko tetangshi tasa ashi, aser tanuria angatet. Parnoki Ochi aser tiazü jangjaa angateta ali. Par Putu nung Naga nunger asoshi tatishitsü tajung toktsü. Tamalen Naga limai bendanger arurtemi "Naga nungerji Ochishir kin ta jembi" Missionary aser Kaket zülur P.T. Philipi pai züluba kaket "The Growth of Baptist Churches in Nagaland" page – 14 nung yamai zülua lir. "The British had implicit faith in the Nagas. A Deputy Commissioner, Mr. Mills, in great appreciation once said, Nagas never lie." Oboula nunger shisatsü libaliro nung ochi inyakba aser jembiba ngua parnoki yamaji zülua doktsü. Laishiba nung Yisui Yihuda nunger Pa dak amangertem dang ashi, "Nenoki kü o nung lira ajangla nenok kü nütsüng, aser nenoki ochi metettsü, aser ochi jagi Nüchi kümdaktsütsü" Yohan 8: 31-32.

Anungji Ochi melira nüchi masü, saka sowar ta Lai jagi ashir. Süra sowar asü nüchi nung alitsü pei sasa metettsüla. Mark 6: 17-20 nung reprangra Yohan baptisübai Herod dang Ochi o ashi nung Herod-i pa tsübo, aser pa o nendaka anga, aser pa metepseti tsüngden jiodak kümzüka ayu. Saka tebuttsü Herodia-i ochi memetet nung Yohan kolak tebuba dang akang. Ochi shisatsü melira nisung takümjia samatsütsü tsübua mali. Anungji item takümji Kibuba meyong masü ta Lai nung shia lir. "Ochi melira itemji Kibuba meyong masü. Saka Ochi seret aser tozükba Kibuba meyong. A. Shin 16:11" ano Yohan 17:37-38 nung Yisui ashi, "Ni Ochi indang khuli agütsütsü aso, aser aji asoshi ni alimai aru. Ochi meyong shir lir parnok ajaki Kü o angar. Pilate-i pa dang ashi Ochiji kechi?"

3. TANÜ PUTU:

Tanü asen Putu nung joko Khristan yimsü arur küm 145 tain akümer. Anungji asenoki ochiji memetetra asenoka Pilate amaji dang asütsü. Ochi o aser shisatsü ya pei saseb (nija) meyong lir, anungji pei sasa angatettsüla. Pei saseb jagi angatetra lokti ajungtsü. Lokti jagi angatetyonga pei saseb kisüng kisüng jagi mangatetra lokti raksatsübaji temela. Naga nungeri Aorji mezüngpur ta ashir süra mezüngpur ama asenok alitsüla. Kaket zülur P.T. Philipi pai züluba kaket "The Growth of Baptist Churches in Nagaland in 1972 nung yamai shia lir." "The most significant is the Naga Mission to Nagas the Ao Church took the lead and others followed." Oboula nunger Putu nung Naga nungerji Ochishir kin ta asübaji tatempang masü, saka alima mesama tashi yamaji tetshitsüsa asenok Putu nunga Ochishirsa asütsüla. Ochi samadaksüba kinji ayatai. Anungji Ochi mulung aser shisatsü agi asen Aori anir mapa ajak nung temulung agüja inyaktsüla.

Aortemi Clean Election ta ayimtena tenzüka, aser tangar kintemia adakji semloka aikati paper nunga agüja mapa tenzüka inyaker. Süra Aori ibaji tatem tashi ochi nung inyaktsüla. Iba jagi tang tangar kinia hau! ta agizüktsü. Tsüngremi tazünger ajak moajang.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

"Arangshidak Longzük "

-L.Kika Pongener, Aoyimkum,Dimapur.

Lung asünunga longchilung, süng asünunga süngtsüh, Keyi asünunga Tsüko, Pongzü asünunga Tayi, Ango asünunga Ngaya-Tsünger-Tsüngko, Akong rongnunga Mar. Yamaji nisung meimchir asünunga Yimpatir, Pojin, aser Teintet rogo, yamala dangji-ang "Arangshidak Longzük" ta ajatsü akok. Yimden yimli nung shilang alanger putu songtema yimsüsüa arur, joko pojin kumadoker anisüngzükba mapang. Arogo tenzükba mapa nunga mapangser, deacon, mission kibur, evangelistic telok, sarasadem telok item mapa ajunga inyaka tenzuka arur joko anisüngzuka aliba mapang.

Sorkar tenzükba mapa nunga Peon Chowkidar nungi shir pei pei dak apet jenjang, oda department tekolak menden tashi nung tenzuka arur, joko pension ngur anisüngzuka aliba mapang. Doctor, Engineer, Lawyer, MLA, Minister, Bureaucrats, Pastor, Evangelist, Missionary etc. item ama akhümtaket mapa ajunga nung tenzuka arur, joko Putir ka ama anisüngzuka aliba mapang. Yimten, arogo, aser loktiliba ajungai parnok nungi shisatsü tajung imlar, nütsüng nübor ajaki parnok nungi tajungshi o tajung imlar. Yimten, arogo aser lokti tentet balala nung ken o tasak adoker koda mesüi por lung nung chidak ama koloni tugutsü ta tebilemtsü khuret agi nennetter alidang, parnok dak arangshir, parnok nungi shisatsü agir, item tebilemtsü khuret ajungaji pongpa-pongpa küma-adoker. Ammang milen züksep ama koloni aotsü ta lenmang mungui nemzua alidang, parnok dak arangshir, parnok nungi shisatsü agir sangwa sangwa küma-adoker. Yimti nung nübor rongnung mepetmesü adokdang, nüken-nüktzü alidang, item Yimpatir aser Teintet rogotem adenshir, tenlaki lapoker lumia sarasademba agi mepetmesü, nüken-nüktzü aser shisabulu tebilemtsü khuret ajungaji yipru-mopung tesashi, tsüngi-tsüngpret den mepet temelem tammang agi süpanger aliba ajak süshi-a orr, anü tesangwa poloktsüba ama süitema oa-adoker.

Yimden, arogo, lokti balala nung mangatetep aser kenbang obang mapu adoker koda mesüi alidang, parnok ayipjanga memejangi, shisa tajung agüja, aibelener dang arrtsüa metongshitsür, tajunger dangbo tajung-a ta ajungshia, tetsüngdai ia yimjung apula mapa inyaka sünepa longjemdaksür. Apijemtsü shin o zuüluri ashiba ama "Kipok sayuba makara nükjidongtem mataloker, saka shisa tajung agütsür aliba agi itemji ataloker" (A.Shin-15:22). "Shisa taka leniba malidak nübor laor, saka kipok tesayuba bulua alidak tekümzük lir "(A.Shin-11:14). Aji oda, yimti nung Yimpatir, Pojin aser Teintet rogo aika alibaji nübor asoshi arangshidak longzük, shisatsü tsüngshidak yinsem, nübor tzüra atemdak tzüpokdak tzüpo aser nübor jenokdak mitsa amai lir.

Aji oda, item Yimpatir aser Pojin-tem ya kechisarena ajak nung teintet rogotem asünung, parnok kodanga ola-osüng jungjunga mangadangi mesüra otsü-olem jungjunga memeteti tapi agi tangar o-lulu angar kecha nunga tetsüng majemoker. Kechi mapa südir süaka, kechi ken o südir süaka kanga arok-aroka, mapang agia shisadanga bilemdanger, aser jungjunga angateter külenang tetsüng ajemoka inyaker aser shilem agir.

Aji oda, parnok ama Teintet rogotemi ola-osüng jungjunga mangadangi mesüra otsü-olem jungjunga memeteti aser kanga junga meshisadangi, kechi mapa nung südir süaka tetsüng ajemoka-dokra, tanaben aji meyipa yanglushitsü lenmang mesü-mesüa kümadoktsü, mesüra parnok sülen ibaji yanglushir shirnok asütsü ??? Molo tonger yatadak maka ama küma-adoktsü, kechiaser parnokji tatempang telangzüba agütsürtem lir. Aji oda, koba yimtsüng, koba yimti, koba jila nung südir süaka parnok ama "Arangshidak Longzük" aika aliba agi lanu asensortem, aturartem aser yimten yimsüsürtema dena kecha mesenseni parnok akhümdong nung, par temoatsü maongka nung anisüngzük-süngzuka alir aser aonunga ayipjanga mejanger.

(Taruba adok nung...)



Youth Ministry Tzúsapang Baptist Arogo "Instrumental Crash Course" 19 nungi 22, June 2017 tashi agidang lanurtem 1st Batch (ICC) tangokba noksa ka angur. Iba sentong nung shisa agütsürji Wb. Sentituba Aier (Margaret Shishak School of Music Patkai Christian College) nungi liasü. Sentong takok asoshi tesayur aser lanurtem dang pelar ta Asso. Pastor Youth Wb. Lima Lemtur-i sangdong ka ajanga metetdaksü.

ANOGO ABEN TSÜNGREM DEN

CHUBATEM MADAK CHUBA YOHAN 18:28-38

Asen Kibuba kechi koma tesüngmangtsü chuba ka, pa miima aliba tematiba ta aru, saka tiyazü tembar kati ashioktsü! Aji saka pa yamaji ashioktsüaka Pa tamaren chuba akhüm jibo jungkai adoka dang lir. Kodang ni Pilate yimya aser yim yimya repring, shiba menden nung amen pa ni jangjangja angu. Pilate sentsüwangshi rematok, saka kü Kibur ain aser sentsüwangshi nung mena lir. Pilate tashi yakta tematok, saka kü Kibur sentsüwangshi meremi teti ali. Pilate obendangdaka, Yisu chuba lir.

Saka pa chuba yimli iba chuba yimli ama masü. Anungji iba chuba tanga chuba ama masü. Pai pa menden rara ajanga mebushir, saka tsüngpret ajanga bushir, mesüzükba agi masü ajungshiba ajanga angu. Pa kilirtem noklangnok den maouer, saka milen den nisungtem aritoka masü saka parnok anir. Tenük agi anguba pa chuba menden kangki ka lir, aser Pa takoktemji bendanga agütsüba ain nung lir.

Anungji pa raraba sobutsüji ochiba lir aser ochiba kisüng. Kodang ochibai takok ngua agidir, takokji among tema teti asoshi alir. Nok agi akokba naro zükji anjung makümdang rematoker. Chuba jamir ka asübaji pa yimya den lemsatepa lir. "Ochi tsütsü alir ajaki Pai kü dang angar."

Lahore nung Khristan ka Islam mezüngmeshiba atema apu

Lahore, June 23 anungji sen tera ajemang ta (Agencies): Pakistan kübok shia tena o agi raratep, ta Lahore nung Khristan 'bicycle mechanic' ka Islam Qayyum-isa ashi.

mezüngmeshiba onük nung ajemdaker apu. Masih-i senji ajema mekümtetsü ta ashi aser pai Ishfaq dang pa-a sensaker ka lir aser sen nungdaker ta langzü. Tena o agi toktepbapang, anameta alirtem adenshi aser mejangjaba nisung kari Masih-i Islam mezüngmeshi ta tai tongloktsü aser iba jagi ken o tuluba aküm, ta Qayyum-isa metetdaksü.

Customer ka den mangatetep adokba sülen pai Islam mezüngmeshiba atema tai tonglokja June 15, 2017 nü apu.

Iba ken o ya Pak Center for Law and Justice ajanga bushisüngdang südar.

Lahore kübok Mariam Colony nung alir Ashfaq Masihji 'repair' dokan ka nung mapa inyaker aser iba tesem nung alir Muhammad Ishfaq ta ser nisuing kati bicycle yangludaktsü, ta Human rights activist Napoleon Qayyum-i osangbener dang ashi.

Bicycle yangluba atema Masih-i sen 35-40 taa meshi saka Ishfaq-i pa sensaker ka,

Raratepba tesemi police aruba sülen Masih apu aser pa Green Town police station-i anir ao.

June 15, 2017 nü Masih apuba sülen, pa anema Islam mezüngmeshiba ken o ka benokogo, ta Green Town police station Station House Officer (SHO), Wasim Akhtar-i ashi.

China nung tenlaki bensatsüba sülen arogo lennir 5 apu

Shangqiu/Henan, June 23 (Agencies): China kübok Henan province nung ketdangsertemi June 8, 2017 nü arogo lennir 5 apu. Ketdangsertemisa tenlaki bensatsüba sülen Khristanem atenshiba kidang 'power supply' agientsü.

Shuangmiao Church nung lennir pezü- Huang Xiangju, Zhao Wenjing, Guo Chungai aser Lü Yuexia nungertem taküm May 5 nü apu. Par pezü den ano anameta aliba arogo ka nung sannüker Zhang Di apu.

June 17, 2017 nü Shuangmiao Church nung züngsem kati osangbener dang ashiba agi, arogo züngsemtemji tenlaki bensatsüba sülen-a atenshitsü merang. Ketdangsertemi parnok dang sentep magitsü atema tetuyuba agütsü saka parnoki tenlaki kimung tejaklen, khen atema tenlaki ka yanglutsü merang.

"Onok power supply mali. Sorkar mapa inyakertermi electricity meter agizüka bener o aser wire tem agien" ta paisa ashi.

OLONG PAITEP # 4461

1			2		3		4		5	
								6		
		7								
		8					9			10
	11									
			12							
13										
			14							
15							16			

TIPILEN		LANGTSÜNGLEN	
1. Nisung tereprangtsü	- (4)	1. Tereprangtsü balala bendanger-	(6)
3. Tesüiba aonung	- (6)	2. Bendena	- (6)
6. Ne kinungtsü tetsü	- (3)	3. Temepishiba o	(11)
7. Khenatema külemiali	- (6)	4. Naga kin-i meraba shiruru ka	- (2)
8. _____ ng	- (7)	5. Shitak masüa ta ashiba o	- (5)
12. Ajaki tsübur aser moner	- (6)	9. Tagidak maka nisung	- (6)
13. Mapang	- (3)	10. Timtem nungi jenbu	- (6)
15. Nisung ajaki ajuruogo	- (6)	11. Nisung ka yimya	- (5)
16. Tekong sobutsü	- (4)	14. Tsük tedong	- (2)

OLONG PAITEP # 4460 TELANGZÜBA

TIPILEN :		LANGTSÜNGLEN :	
1. Sentsü, 3. Alar, 6. Nikongdang,		1. Süngdong, 2. Senchi, 4. Lenden,	
8. Tai, 9. Sen, 11. Perangpong,		5. Odi, 7. Tazüngla, 8. Temeim,	
12. Tama, 13. Samesa.		9. Sangma, 10. Hai.	



ALOKBA O KINUNGTSÜ WARAKLA NA KIBOK SENSAXEMER

Alokba : Tantsü, luagi yimlang mepu nungto Mongsentsür kati tanur bena lir asuraja... aser....

Warakla : Waaa, aji kechi tesüngmangtsü ali? Mongsentsür ang masü Chunglitsürüa abentsü, aser onok tetsürjito tanur abentsü aliraja, anungji na tokorai liangmati.

(ita ishika lir yimer ajungai tanur tebuji Alokba-a ta jembiba Waraklaia yimdong nung angashir shilanger)

Warakla : Hai napingba azü-ak sang, kidang mienprongba yagi meperi ano kima yimdong ajunga nung tala pulaa tenüngmenük bener arutsür südi?

Alokba : Waa ya kechia ta shiner aji?

Warakla : Yimlangtsür kati bena aliba tebuji naa ta yimer ajungai aoi-a punga jembidarji.

Alokba : Yaa, nai kü o manga ashi, ni ita ishika tejaklen nü dang lasa ashidang nai kü o zükdokji niang aremzüker anen ati. Hauni yimer jagi tejembila jembirani.

Warakla : Oh Alokba!!

Lilir: SMS

TANÜBO NAI LANGZÜANG

Q. Information and Broadcasting (I&B) Ministry nung Secretary tasenba shiba asütsü ?

[A] Jagdish Prasad Meena

[B] P K Pujari

[C] Aruna Sundararajan

[D] Narendra Kumar Sinha

===== (Taruba adok nung onoki langzüksü)

YASHI ADOK TELANGZÜBA : June 20

Tanur asoba anogo nung salem osang den noksa angai adokdaksünürü - Tenüng, Küm, School, Taidak & salem osang tejanga züfur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimim bureau ben nung agüang.

Tepela Tasoba Anogo

1. Tenüng : _____
 2. Tasoba anogo: _____
 3. Küm : _____ 4. Class : _____
 5. School : _____
 6. Talitak : _____
 7. Salem osang : _____

NAIA YA METETER MA

2024 KÜM TASHI NUNG INDIA NÜTSÜNGYONGSÜK TIEMBA AKÜMTSÜ



2024 tashi nungbo India lima nung nütsüngyongsük China dang nungi tiemba renloktsü ta World population Prospectus-i asadangtetba UN ajanga tawa metetdaksüogo. Alima ajunga nung yaküm küm tashi nütsüng billion 7.4 liasü saka takümbo billion 7.6 tashi lir aser yamai dang renloka aonungbo 2050 tashi nungbo billion 9.8 tashi renloktsü ta UN ajangasa metetdaksüogo.

SUDOKU # 3563

TELANGZÜBA # 3564

7	4		6	9			2	3	4	2	7	6	1	8	5	9	
	2		1				7	8	7	1	9	5	4	6	2	3	
8	5		4					5	6	9	8	2	3	4	1	7	
	9			2				6	8	5	4	7	2	3	9	1	
3	6	4				2	8	9	4	9	7	1	3	8	2	6	5
	8				4		5	3	1	2	3	5	9	6	7	4	8
9				1	7			7	1	8	6	4	9	5	3	2	
2					9		7	9	3	4	2	8	5	1	7	6	
			8	6	9	2		2	5	6	3	1	7	9	8	4	

OJANG LUTEP # 4067

ÜMBTAKO :

IAND :

ITR :

TEEPTOKTBA :

NNUG :

OSIOPPTION :

ARTPY :

GINUN :

AUNGDOKNBO :

UNGJLA :

OJANG LUTEP TELANGZÜBA # 4066

NAGALAND NUNGBO LENMANG YANGLUTSÜ YIMYA MEMETET KECHIBA KÜM SHIA RAKSADOKER

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Tanü nai mapa aika tembanganyaktetsü mapang tajung. Iba der külemi ner kinünger aser medemertemi na molungsoa yaritsü.




Taurus
20/4-20/5

Tangar den mangatetep madoktsü merangang. Nüngdak maliba sentong nung nai shilem mag tajungba asütsü aser nü shisatsü azüoktsü merangang.



Gemini
21/5-20/6

Tanü nü dak tetoktepba shisatsü alitsü südi. Nü nübu nüngdaka aliba tembar kar nai yariang saka tali mejembitsü merangang.



Cancer
21/6-22/7

Nai tanü nü dak molung lemtetsü merangang aser kinungertem der lungjema alitsü asoshi sentong yangluang.



Leo
23/7-22/8

Nai tanü nü tamang jenjang asüngsashitsü aser süngjema alitsü merangang. Nü o agi tangar temolung meyrutsütsüsa jembiang.



Virgo
23/8-22/9

Tanü nü dak molung masüba kar alitsü. Nai süngjemshir iba kulij shisadangtsü aser iba ajanga nü taküm nung temelenshi tajung alitsü.



Libra
23/9-22/10

Tanü nai mapa tasen ka tenzuka inyakdangnütsü akok. Nü khurettem medemertem der lemsatepang aser na asoshi anisüngzük bushiang.



Scorpio
23/10-21/11

Tanü nai nisung tasen kar ajurutsü akok. Kari nü dang taküm lenmang kar sayutsü aser nai junga bilemdangra ibaji ajanga na ajangzüktsü.



Sagittarius
22/11-21/12

Tanü nü taküm nung temelenshi tajung kar adoktsü. Tamang jenjang asüngsashiba ajanga nai tesünek angutsü.



Capricorn
22/12-19/1

Nai tanü nü taküm asoshi junga shisadangtsüa aser nai telangzüba kar angustü. Tangari nü taküm nung temelenshi repringtetsü.



Aquarius
20/1-18/2


Ner kinünger nem nai mapang agütsütetsü merangang aser parnoki ashiba o tem ni züngzünga angaokang. Iba ajanga nü taküm nung temelenshi arutsü.



Pisces
19/2-20/3

Tanübo nai jangraba mapa kar inyaktsü merangang. Nü yimya melenshiang aser tajung bilemba nisungtem den nai mapang indokra na parnok ama akümtsü.

Tyrese Gibson Fast and Furious Franchise nung Denzel Washington shilem agidaktsüner



Denzel Washington (File)

ashiba agi, iba film ya alinük tasen ka nung yangluner aser actor tasentem taruba film nung shilem agidaktsüner, ta osang ka ajanga metetdaksü.

"Ni iba film Africa nung Cape Town aser Johannesburg nung yangluner aser maneni Matt Damon aser Denzel Washington natia iba film nung shilem agidaktsüner. Ni tenati iba film nung shilem tajung agitettsü ta amanger," ta osang benertem den jembidang Gibson-i ashi.

Gibson-isa ashiba agi, The Fate of the Furious movie behind-scenes-clips tem ajanga fan tem nem movie yangluba mapang atalokbatem jangjaa sayutsü.

"Film nung asayamenü aser tanga shilem tem aika lir, koba onoki indokadokogo. Havana aser Cuba nung tangokba shilem aika lir," ta Gibson-i ashi.

Los Angeles, June 23 Washington natia shilem agidaktsüner. (Agencies): Actor Tyrese-i taruba Fast and Furious movie Africa nung yanglutsü imlar aser pai iba movie nung Matt Damon aser Denzel Washington natia shilem agidaktsüner. Arishi küm 38 actor ya iba series nung 2003 movie 2 Fast 2 Furious nung Roman Pearce ama shilem agia tenzük. Pai

Rajinikanth indang '2.0' trailer December 12 nü sayatsü

New Delhi, June 22 tamajunger shilem agiba (Agencies): Nüngtugu actor, Rajinikanth indang film '2.0' trailer pa tasoba anogomung, December 12 nü sayatsü. Akshay Kumar-i nisung

Trade analyst, Ramesh Bala-i ashiba agi, iba film ya 2018 küm January 25 nü sayatsü, aser film trailer ji Rajinikanth tasoba anogomung nung sayatsü.

Salman Khan indang film Tubelight DJ atema tetsükdaktsü masütsü: Pooja Hegde

Bengaluru, June 22 asoshi imlaa atar. Film (Agencies): Allu Arjun aser Pooja Hegde nati ashiba agi, Salman Khan indang 'Tubelight' film ya DJ (Duvvada Jagannadham) film atema kecha tetsükdaktsü masütsü. Iba film anaprongla ya June 23 nü sayatsüba lir. "Mezüngbuba ni nung kecha atemaa shisamebulur. Salman indang film Tubelight takok

ta ni bilemer. Salman film ya onok asoshi tetsükdaktsü ka amai manguer. Nüburtemi iba film anaprongla repringtsü imlar," ta Pooja-i ashi. DJ film ya maneni Tamil films Vanamagan and AAA (Anbanavan Asaradhavan Adangadhavan) ajanga tetoktepba agütsütsü kechiyong iba film yaa kasa anogo nung sayatsü.




Mumbai, June 23, 2017: Brihostibarnü Mumbai nung SoneyLIV nung film tatsü ana 'The Gift' aser 'Papa We Love You Too' sayaba sentong nung Bollywood actor, Mandira Bedi, Kushal Punjabi aser television actor, Nandish Sandhu, Kabir, Arya Sadan aser Uday Sodhi nung külemi tangokba noksa nung angur.

TAN HOPTA ATEMA - KOMA SÜLA ?

Q. Nagaland government nung ochimashi inyakba mapatem ajunga ya CBI nem bushisüngdaktsütsü asoshi temelaba agütsü nunga koma süla ?

Olong 20 shi nung June 23, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobarnü adoktsütsü.

Fashion App dena Karbonn Aura Note 2 sayaogo



June 23, 2017 (Agencies): Karbonn Mobiles-i taoba mapang nung fashion search app dena 'Fashion eye range' smartphone tem yaküm sayua liasü.

Karbonn Mobiles-i tanü 'Aura Note 2' sayaogo, iba smarh phone ya tamshirtem 'fashion' aser 'styling' nung tenüngdakba tem dak rangloker

yang luba phone ka lir.

'Karbonn Aura Note 2' ya 'Fashion Eye' aser 'Fashion Eye 2.0' phone den tatongtep phone lir. Iba phone nung ya 'Fashion app' ka keta yanglua lir aser iba ajanga tamshirtemi süoshi ka noksa nung

tang click asüba ajanga ayonga ayonga bushiteter. Maneni tamshirtemi video search feature amshia süoshi bushia alitettsü.

Iba AI engine app ajanga sentsü, print aser pattern tem pa sasa asadangteter aser iba ajanga süoshi ka result aser taginubatem agütsür. App ajanga ano tamshirtemi süoshi

jenjang e-commerce portal balala nung jenjang medemdanga pei taginüba shimteter.

Aura Note 2 nung OS ya Android 7.0 Nougat lir aser tesülen camer 13-megapixel aser tejaklen camera 5-megapixel keta angutsü. Aura Note 2 nung battery tashiji 2,900 mAh lir. Iba phone nung ano 'Vistoso' taser 'inbuilt app' ka keta lir koba ajanga Artificial Intelligence amshia noksatem 'artwork'-i melendaktsüteter aser itemji mug, t-shirt amala nung print sütettsü.

Karbonn Aura Note 2 nung 1.25 GHz quad-core processor den 2 GB RAM aser 16 GB internal storage keta lir koba 32 GB tashi atsülangtettsü. Aura Note 2 nung tanga features tem rongnung Bluetooth, GPS, FM Radio aser G/P/L Sensors, OTG aser in-built photo aser video editor densema lir. Aura Note 2 ya Coffee-Champagne aser Black-Champagne sentsü nung sen 6,490 agi angutsü.

6GB RAM aliba Honor 8 Pro July nung sayatsü



June 23, 2017 (Agencies): China nung smartphone yangluba company, Huawei ajanga 6GB RAM aser 128GB ROM aliba Honor 8 Pro India nung July tetenzüklen sayatsü, ta iba company ketdangser ajanga Hokulbarnü metetdaksü.

"Honor phone rongnung Honor 8 Pro ya tajungtiba lir aser iba phone ya jenjang talang agi ayoktsü," ta Huawei India Consumer Business Group indang Product Centre nung Director, Allen Wang-i osangbener dang ashi.

Alima junga nung iba phone

ayokba indang revenue nung 2016 küm shilem 35 renlok aser iba smartphone million 139 ayok. 2017 mezüing quarter nung iba company ajanga yangluba smartphone million 34.55 tashi alinük 74 dangi belenshiogo.

Honor 8 Pro smartphone nung tesülen fourth generation dual-lens camera den 12-megapixel, f/2.2 aperture, laser autofocus aser LED flash keta lir aser tejaklen 8-megapixel, f/2.0 camera keta lir. Iba phone indang processor ya Kirin 960 lir.

Iba smartphone tasazük ya 5.7-inch QHD (1440x2560 pixels) LTPS LCD, 2.5D glass den 2K HD display aser 4000mAh battery keta lir.

Iba phone nung 4K video reprangteter. Honor 8 Pro smartphone den virtual reality (VR) ka angur aser iba phone ya anüing sentsü aser tanak nung angutsü.

Honor 8 Pro ya Huawei indang EMUI 5.1 nung ajemdaker Android 7.0 Nougat operating system lir aser SIM ana inoka amshitsü akoker.

Employee tasentem aika tenüngdakba skill agi anünga lir: IBM study



June 23, 2017 (Agencies): India nung higher education system ya lokti ainba den kangabo moputep aser iba ajanga industry tem nung mapa inyaktsüpurtem skill shidak keter monguteter, ta IBM Institute for Business Value (IBV)-i bushisüngdangba nung ngutetogo.

Iba bushisüngdang nung ngutetba agi, India nung shishilembadak nisung tasen shimokba rongnung noklang nung shilem 40-i dang tenüngdakba skill tem bena lir.

India nung shishilembaertemi ashiba agi, nisung tem skill

shidak angazüker alirtem angutsü tasak.

IMB-i "Upskilling India" ta nüingja agütsür iba bushisüngdang ya India nung academics, corporate-recruiters, aser emerging education leader tem-i parnok tebilembatem lemsatepba nung ajemdaker agi.

Iba den külemi iba bushisüngdang ajanga tawa entrepreneur, venture capitalists aser corporate executive tasentem indang result tem asadanga liasü.

Indian executives tem

bushisüngdang nung ngutetba agi, linük nung higher education system ajanga kaketshirtem, industry aser lokti tenüngdakba tem mepiridaktsüteter.

India nung tesayurtem bushisüngdangba nung parnok shilem 60-i ashiba agi, higher education system yagi lokti melenshia aoba nung tenüngdakbatem asoshi telangzüba magütsüteter.

2010 aser 2030 tsüingda nung India nung mapa inyakertem million 750 nungi billion 1 tashi atsülangtsü imlar.

India nung assemble asüba Apple iPhone SE ayoker




Bengaluru, June 23 Bengaluru nung ayoker. Iba (Agencies): Apple indang India iPhone SE box nung 'Designed nung yangluba iPhone SE by Apple in California,

Assembled in India', ta zülua lir. India nung assemble asüba iPhone SE 32GB aliba ya 27,200 aser 128GB aliba ya 37,200 aki ayoker.

iPhone SE 32GB 'Made in China' ya sen 21,999 agi ayoker aser iba iPhone ya India nung taoba küm April ita sen 39,999 agi saya-a liasü. Linük nung assemble asüba iPhone ya yimya agi jenjang tajemba agi ayoktsü tim, saka tang tashi iba iPhone jenjang tepila melie ayoker, ta osang ka ajanga ashi.

Iba iPhone SE tasazük inch pezü lir aser iPhone 5S den tasazük kasa dang lir. Iba iPhone SE indang processor ya A9 aser 12-megapixel camera lir. Iba iPhone nung secure chip keta lir aser iba ajanga Apple Play amshitsü akoker.



Maanayata Dutt, kinungbo Sanjay Dutt aser tena chir jakrep Iqra aser Shahaan Europe nung vacation amongba mapang tangokba noksa nung angur. Maanayata Dutt ya social media nung kanga shilem agir aser lai instagram nung noksatem inoktsüba ya teti balaka asür. Lai linük balala repranga senzütsü asoshia kanga jangrar.

ISRO-i bendanger satellite 200 dak tema yokogo

June 23, 2017 (Agencies): Indian space agency-i Hokolbarnü satellite 29 yokba ajanga bendanger indang satellite India nungeri yokba 200 süiogo.

Polar Satellite Launch Vehicle's (PSLV) rocket-i Hokolbarnü linük 14; Austria, Belgium, Britain, Chile, Czech Republic, Finland, France, Germany, Italy, Japan, Latvia, Lithuania, Slovakia aser US nunger indang nano satellite 29 benertua toktsüogo.

Rocket indang tongtibangtiba osetji India nunger indang kg 712 Cartosat-2 series satellite

liasü. Iba satellite ya küm 5 atema alima reprangtsü asoshi design süa yanglur yokogo. Nano satellite 30 rongnung India nunger satellite NIUSAT densema liasü.

Antrix Corp, Chairman-cum-Managing Director, S. Rakesh-i ashiba agi, Hokolbarnü yokba satellite tem mezüingoki India nungeri tang tashi nung bendanger indang satellite 180 yoka lir. Antrix Corp ya ISRO indang commercial arm ka lir.

ISRO puri bendanger satellite 1999 küm nungi yok tenzük.



Moscow, June 23, 2017: Hokolbarnü Russia yimtiba, Moscow nung India Finance, Corporate Affairs & Defence Union Minister, Arun Jaitley aser Russia Defence Minister, General Sergei Shoigu na leniba nung 17buba IRIGC-MTC senden amenba noksa nung angur.

Sorkari Thiruvananthapuram densema ano Smart City 30 shim

New Delhi, June 23 (Agencies): Hokolbarnü sorkari ano smart cities 30 sangdongogo, aser ibaji densemabo 2015 June 25 nü tenzükba Smart City Mission kübok yimti ajak agi 90 asütsü.

Tang tasen sangdongoba yimti 30 ji Thiruvananthapuram, Trivendrum, Naya Raipur, Rajkot, Amaravati, Patna, Karimnagar, Muzaffarpur, Puducherry, Gandhinagar, Srinagar, Sagar, Karnal, Satna, Bengaluru, Shimla, Dehradun, Tiruppur, Pimpri Chinchwad, Bilaspur, Pasighat, Jammu, Dahod, Tirunelveli, Thootukkudi, Tiruchirapalli,

Jhansi, Aizawl, Allahabad, Aligarh aser Gangtok lir.

Tanü New Delhi nung 'National Workshop on Urban Transformation' sentong nung yimti 30 sangdongoba mapang Urban Development and Housing & Urban Poverty Alleviation Union Minister, M.Venkaiiah Naidu-i smart city 40 atema yimti 45 toktepa liasü, ajisüaka yimti 30 dang shimtet, ta metetdaksü.

Tanü sangdongoba yimti 30 nung smart cities sentongtem kübok sen crore 57,393 intoktsü. Iba ya densemabo smart cities 90 nung sen crore 1,91,155 intoktsü.

Naidu-isa, smart city mission kübok tanungba smart city 10 shimtsü atema city 20 tokteptsü, ta metetdaksü. Item yimti 20 ji-Itanagar (Arunachal Pradesh), Biharsharif (Bihar), Diu (Daman & Diu), Silvassa (Dadra and Nager Haveli), Kavaratti (Lakshadweep), Navimumbai, Greater Mumbai aser Amaravati (Maharashtra), Imphal (Manipur), Shillong (Meghalaya), Dindigul aser Erode (Tamil Nadu), Bidhannagar, Durgapur aser Haldia (West Bengal), Meerut, Rai Bareilly, Ghaziabad, Sharanpur aser Rampur (Uttar Pradesh) yimtitem lir.

India-i NSG züngsem akumtsü benokba China-i nokdangtsü

Beijing/New Delhi, June 23 (Agencies): Switzerland yimtiba, Bern nung tang NSG linüktem senden tagidak mapang ka nung Hokolbarnü China-i maneni, NPT tezüngzüktep agia maliba linüktem Nuclear Suppliers Group (NSG) nung adentsü makok, iba tangatetba nungi ozü linük masetshir, ta metetdaksü.

Tanü China yimtiba, Beijing nung osangbenertem senden ka nung jembidang China foreign ministry otongdar, Geng Shuang-i pai iba osang metetdakja liasü.

Tang NSG linüktem senden tagidak mapang nung China-i

linük tangatetba nungi asetshitsü asü, ta asüngdangba langzüdang Geng-i, "NSG nung züngsem tasen agizüksü atema temzüngtem lateta lir, aser Seoul (South Korea) nung senden amenba mapang nunga iba onük atema jembioogo. Item temzüng nung ajemdaker onoki inyaktsüla," ta metetdaksü.

"Züngsem tasen agizüksü dak sendakba nung, Switzerland nung tang tagidak plenary senden nunga Seoul senden nung lemtetba ama inyaktsü," ta paisa ashi.

India-i NSG nung züngsem akumtsü atema benoka lir,

ajisüaka China-i nokdangyonga arur, aser ibaji ajanga linük ana tesendaktep kongshir.

Ano Pakistan linükia NSG nung züngsem akumtsü atema benoka lir, aser China-i parnok nungiter.

US densema anüdoklen aliba linük aikati India iba telok nung züngsem akumtsü atema nungiter, ajisüaka China-i, iba telok nung züngsematsü atema Nuclear Non-Proliferation Treaty (NPT) tezüngzüktep agitsüla, ta tekong meranga nokdangba ajanga tetsükdaksü ajurur. India-i NPT tezüngzüktep agia mali.

Srinagar nung DSP Mohammad Ayoub Pandith long agi onset

Srinagar, June 23 (Agencies): Srinagar nung Jamia Masjid kima Ioktii Deputy Superintendent of Police ka süoshi ajak semzüksür long agi onsetba sülen state Chief Minister, Mehbooba Mufti aser separatist Hurriyat lenir, Mirwaiz Umar Farooq densema lenir aikati iba tatalokba aitsüogo.

Iba tatalokba ya taaktsüka lir, ta shia Chief Minister-i, sepaitemi kobika aremzüksü, sepaitemi maremzükttetra takoksa alitsü, ta metetdaksü.

Srinagar yimti tejenba kübok Nowhatta tesem nung aliba Masjid nung Hokolbarnü sarasadem sülen sayutsüngir, Mirwaiz-ia, iba tatalokba ya onok yimsü alema lir, ta aitsü.

Tanü 12:30 ako meta DSP Mohammad Ayoub Pandith-i Muslim nunger tekülem kidang nungi adokertem noksa tangokba sülen Ioktii pa amak, aser pai-a pistol agi nisung asem yirutsü ta osang angazüker, ta police osang ajanga ashi.

"Hokolbarnü sarasadem sülen tensa meraksatsü atema Iokti azüoktsü asoshi DSP nem iba tesem nungji mapa lemezükja liasü," ta Director General of Police, SP Vaid-i ashi.

Paisa, "Masjid mita

reprangba sülen iba telung nungjagi adokdang nisung tamajunger kari pa puiter pa dak azük," ta ashi.

Vaid-i ashiba agi, iba tatalokba dak sendakba nung tang tashi nung nisung ana pua lir, aser nisung tasembubajia jangjaogo.

"Parnok ajak nisung tepsetba nungji densema lir, aser parnok obendangtsü," ta paisa metetdaksü.

Mohammed-i pa kümzüksü atema pistol amshia nisung asem yirutsüba pusema Vaid-i, "DSP ket nung pistol ka liasü, aser pa taküm kümzüksü asoshi pa dak temeten liasü," ta ashi.

J&K Chief Minister, Mehbooba-i, "Linük nung police force tajungtibatem rongnung J&K police densema lir. Parnok tasütait, saka parnoki pei nüburtem den inyaker ta bilema kanga azüoka tashi amshir. Saka parnoki kobika aremzüksü? Parnoki maremzükttetsüsa anogo ka arura kanga tasak asütsü," ta ashi.

Laisa, police ketdangserji nija mapa atema Masjid jagi aoba masü, saka nüburtem taküm kümzüksü aser pa duty inyaktsü atema aoba liasü, ta ashi.

Ram Nath Kovind-i Tir election atema tenüng agütsüogo



New Delhi, June 23, 2017: Hokolbarnü Parliament House, New Delhi nung Ram Nath Kovind-i linük Tir election atema tenüng agütsüba noksa nung angur. Tanü Kovind den Ato kilonser, Narendra Modi, BJP lenirtem aser state kar nungi Chief Minister tema liasü.

New Delhi, June 23 (Agencies): BJP-i aniba NDA-i shimba candidate, Ram Nath

Kovind-i tanü Tir election atema tenüng agütsüogo; pa Parliament House-i aodang Ato kilonser, Narendra Modi-i pa meina liasü.

Kovind densa BJP lenirtem, NDA-i yimsüsüba state kar nungi Chief Minister tema liasü.

Kovind ya taoba Bihar Angh lir. Linük Tir election July 17, 2017 nü agitsü aser Kovind-i Congress-i aniba opposition party tem candidate, Meira Kumar den tokteptsü.

July 20 nü vote zünga election osang sangdongtsü.

Shiv Sena, Janata Dal (U) aser AIADMK party temia Kovind pusemstsü, aser electoral

college nung vote shilem 63.1 pai angutsüsa jenjang ka nung lir.

Kovind-i vote shilem 48.9 shi BJP-i aniba NDA nungi angutsü aser NDA nung madenba regional party temia pa yariba ajanga vote shilem 63 dak tema angutsü imlar.

Yashi BJP lenir, Prabhat Jha-i, "Opposition-i Meira Kumar tenüng benoker, kechiyong parnoki parnok sendoker ama bilemer. Vote shilem 60 dak tema NDA-i shimba candidate, Kovind-i angutsü ta asadangtetogo. Iba election nung parnoki (opposition) tokteptsü lemtetogo, ajisüaka parnoki tamakok angutsü," ta metetdakja liasü.



New Delhi, June 23, 2017: Hokolbarnü New Delhi nung Science & Technology, Earth Sciences & Environment, Forest & Climate Change Union Minister, Dr. Harsh Vardhan-i "Role of Media in Dissemination of Scientific & Technological Advancements" workshop nung osangbenertem den jembiba noksa nung angur.

Pakistan bomb lendong nung nisung 12 asü



Quetta, June 23 : 2017, June 23 nü Quetta, Pakistan nung bomb apokdang yiruba nisung ka mozüki-i anir aoba mapang tangokba noksa nung angur.

Islamabad, June 23 (Agencies): South west Pakistan nung aliba Quetta yimti nung suicide car bomb ka Provincial police tekolakba indang office anasa apok, aser iba lendong nung nisung 12 pokset aser 14 yiru, ta police temi osangbener dang ashi.

Balochistan police tekolakba indang office kima aliba checkpost nung Hukulbar anepdang iba lendong adalok, ta police kettangser kati ashi.

Iba lendong nung asürtem rongnung police tanishir trok densema lir, ta senior police officer, Ali Mardan-ia ashi.

Gari ka iba checkpost anasai aruba mapang police temi iba gari anendaktsü aser iba mapang bomb ya apok, ta provincial sorkar indang odongtar, Anwar ul Haq Kakar-

i osangbener dang ashi. "Anepdang 8:45 (03:45 GMT) ako meta Toyota Corolla gari tejen ka police tekolakba indang office anasai aru aser iba gari ya police temi anendaktsü. Iba mapang bomb ya apok," ta Kakar-i ashi.

Pakistan Taliban indang telok, Jamaat-ur-Ahrar ajanga iba lendong ya agütsü, ta iba telok indang odongtar, Asad Mansoor-i sangdong ka nung ashi.

"Iba lendong nung yirur alir ya kar bo temang kanga mejungi lir. Aser parnok timba police aser traffic kettangser lir," ta police kettangser, Altaf Hussain-i ashi.

"Iba lendong agütsüba tesem ya 'red zone' lir aser iba tesem nung IG indang office aser State Bank of Pakistan lir," ta Altaf Hussain-isa ashi.

Balochistan province indang yimtiba, Quetta nung sorkar aser mitkar indang kiojen nung tenük yoka iba ama lendong agütsür aser nüburtem dak kasa lendong agütsür.

Quetta nung aliba Saryab abu kübok February ita nung bomb ka apokba mapang bomb disposal squad ana aser civilian 11 asü.

Taoba küm August ita iba yimti nung aliba Civil Hospital nung pei sasa temang nung bomb inoker pokdaktsüba lendong nung nisung 74 asü aser ita ana sülen police academy ka amakdang nisung 60 asü.

Item lendong agütsüba ya Pakistan Taliban, ISIL aser Pakistan nungi nüchiso meshir telok, Baloch ajanga tenüng agia lir.

Grenfell Tower mi lendong ya fridge nungi adok: Police

London, June 23 (Agencies): June ita tetenzüklen London nung nisung aliba ki tulu ka mi adoka arondang nisung 79 asü aser iba lendong ya fridge-freezer nungi adok aser iba ki tema nung inoka aliba 'cladding' ajanga iba mi nungi mekümzüktet, ta police ajanga ashi.

1974 küm yangluba Grenfell Tower nung storey 24 aliba ya June 14 anepdang mi adoka arong aser iba lendong nung nisung 79 ya asü mesüra sama, ta police temi ashir.

"Iba mi ya ajungbena adokba masü ta mongin temi bushitetogo. Aser iba ki

yanglushiba nung shilem agiba company tem bushisüngdang südagi," ta Detective Superintendent, Fiona McCormack-i ashi.

Iba ki temalen inokba cladding aser tiles tem ajanga mi nungi kümzüksü asoshi tendangba nung tamakok alu, ta McCormack-isa ashi.

Iba ki yanglushiba mapa taoba küm ang tembang aser iba mapang cladding ya inok.

Iba ki nung mi jangruba ajanga England nung iba amala cladding inoka yanglua aliba tower 600 dak tali nung bushisüngdang aser maparen balala tendangba mapang lir.

Iba lendong nung asür ya tejangja memetet aser iba ki nung alirtem dang iba kuli tejangja metettsü asoshi asüngdangba mapang ka lir, saka tejangja monguteter, ta lai ashi.

Iba lendong nung asür ya anu alitsü südi, kechiyong iba tower nung ozüing alema alir nisung aika liasü, ta police temi ashir.

"Iba ki nung forensic amshia bushiba ya taküm küm metemtettsü südi," ta McCormack-isa shisem.


Ozüing alema arua alirtem süaka parnoki nüngdakba teyari agütsütsü, ta Ato Kelonser, Theresa May-i Brehostibarnü metetdaksü.



Moscow, June 23 : Hukulbarnü Moscow nung India Defence Minister, Arun Jaitley aser Russia Defence Minister, General Sergei Shoigu nati anir 17buba IRIGC-MTC senden amenba mapang tangokba noksa nung angur.

Nicolas Maduro sorkar anemer nisung 75 taküm samaogo

Caracas, June 23 (Agencies): Brehostibarnü Caracas nung sorkar anema longkak aiter arishi küm 22 tain tebur ka kasetba ajanga Venezuela nung tir, Nicolas Maduro yimsüsüba arur ita asem tsüngta nung nisung 75 taküm samaogo.



Nicolas Maduro (file)

Iba nisung ya Caracas yimti nung aliba Altamira tesem nung longkak aitba mapang tepset, ta public ministry ajanga Twitter nung sangdong saka kechi oset agi tepsetar tejangja shia mali.

Iba nisung ya National Guard indang züngsem ajanga kaset, ta Opposition telok nungi Jose Manuel Olivares-i ashi.

April 1 nungi tenzüka Venezuela linük tesem balala nung anogoshia amai Maduro anema nüburtem longkak aiter aser parnoki Maduro menden nungi alur election tasen

agishitsü akhanger. Iba longkak aitba ya aiben azüdokshia akümer aser nisung 1,000 dak tali yiruogo aser 3,000 dak tali pua lir, ta kettangser kati ashi.

Linük nung chiyongtsü, mozü aser nüngdakba osettem agi anünga akümba ajanga rongsenkettsüng nung takoksa adoka lir, aser iba densa adokdaktsüba ya Maduro dak tongloksür.

Iba timtem ya US ajanga inyaker, ta Maduro-i aitsür.

**OFFICE OF THE
WAMEKEN SENSO TELONGJEM, TZÜDIKONG TOWN
TENÜNGSANG ASER TETUSHI AGÜTSÜR**

Watsü Dr. S. Arenla, Wb. John Jamir aser Wt. S. Arepla lmsong (Wameken) jala, lai Nagaland University kübok Botany Department nung thesis "Study on Ectomycorrhizal Application in Reforestation Practices : A case study in Zunheboto District, Nagaland" dak ajemdaker Doctor of Philosophy (Ph.D) takok tulu nung ngua konang nüngsang bener arutsü nung Wameken Senso Telongjem Tzüdikong Town ajanga tenüngsang aser tetushi agütsür. La taküm aser wadang nung tsüngremi maneni len aniang ta ozü sensosanger sarasadem.

Sd/-
T. Imli Lkr
President, WSTTT**Sd/-**
Wapang Jamir
Secretary, WSTTT

**OFFICE OF THE
CHUCHUYIMPANG STUDENT'S UNION
TENÜNGSANG AGÜTSÜR**

Wb. Lanuinba aser Wt. Jongpongprepla jabaso, Dr. Maongtoshi-i "Agricultural Production & Productivity of Nagaland: A case study of Mokokchung & Zunheboto District" onük nung ajemdaker Prof. Mithilesh Kumar Sinha, Nagaland University, Lumami tanükba kübok Economics nung Doctor of Philosophy ngutetba asoshi Chuchuyimpang Students' Union kanga dang nüma tanga tenüngsang agütsür.

Tarutsü anogotem nunga maneni nü nem takok moajang, ta Union-i sarasademtsür.

Sd/-
Mr. Temjensangba lmsong
President (CKT)**Sd/-**
Yashiakum Jamir
Gen. Secy (CKT)

MENUNGRA BILEMTETER

Lt. Imtisashi Longkhum
Nai onok toktsür or tanü June 24-06-2017 nü küm ana ajungba menungra bilemteter. Na akümüli nung alidang pelatepa aliba mapatem teti onok mulungjang nung lir.

**Nai toktsür aoba kinungtsü,
oja, oba aser kinünger
adianutem.**



LAND FOR SALE 80x90 = 7200 Sq.ft.
Behind Hope Academy
For details Call 7308024742 School (Naga United).

Dimapur nung...

(Tapak 1 nungi...)

Tanü-asüing amshiba technology maparen rongnung jana endoktsü atema 'vermicomposting' ya ka lir aser iba ajanga aseni endokba janaji senti kümdaktsütsü akok. Anungji, asenoki vermicomposting technology amshitsüla ta paisa ayongzük.

Tanü Director, I m k o n g n e k e n - i vermicomposting technology indang temetetsü metetdaksü aser Soil Conservation Assistant, Pango-ia vermicomposting indang live demonstration sayu.

Sentong nungsa Group for Environment Management and Services (GEMS)-i kiyonger nem organic smart bins aser vermicompost mol lema agütsü.

BILEMTETER

Asür Mr. LEMJENZÜLU
Sür küm 2 ajungba
Anogo: 24-June-2015

Temeim Oba na sür tanü küm 2 ajungba anogo onoki na menungra bilemteter aser kodanga amadoktsü makokba nü ola. Temeim onok molungjang nung teti lir.

Temeim Kinungtsü, Chirnur aser Semchirtem.



ELITE HEALTHCARE TRAINING INSTITUTE
Dimapur - 797112, Nagaland
ADMISSIONS GOING ON

Courses offered	Eligibility	Duration
FHW (Female Health Worker) ANM	10 th Passed	2 Years
DHAI/ Nursing Assistant	8 th Passed	1 Year
CENTRE-I Dhobinallah Culvert, Near ICICI Bank.	CENTRE-II 4th Mile Near Agri Expo Junction	
M.No: 9856125245/ 9615694009	M.No: 8974507931/ 9862639134	
Office Timing: 9 AM - 1 PM (Monday to Friday)		

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND : KOHIMA

ADVERTISEMENT

Dated Kohima, the 22nd June 2017

NO.DET-12/40/16 : Applications are invited from interested candidates for undergoing 2(two) months training at Indian Institute of Technology (IIT) Madras on "Essential Skill for Enhancing Employability of Diploma & Engineering Students".

The main objective of the training programme is to provide an exposure to emerging and new age Machinery through IITM's central workshop and introducing concept of incubation through interactive sessions with IITM student and faculty, IITM Research Park incubates and successful small and micro entrepreneurs.

The training programme is for 2(two) months starting from 1st Aug to 30th Sept 2017. The training will be provided free of cost.

Course	Trade/Branch	No of seats
Diploma	Mechanical Engineering	5
Engineering graduate	Mechanical Engineering	10

Candidates are requested to submit the application with photo copies of all the relevant documents and two passport size photograph to the undersigned. Last date of submission is 7th July 2017 and screening test will be held on 13th July 2017 at Directorate of Employment, Skill Development & Entrepreneurship, Kohima.

Sd/-
(MUTHINGNYUBA SANGTAM)
Director

Employment, Skill Development & Entrepreneurship
Nagaland, Kohima.

Issued by: DIPR

GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA

NO.ED/SCH/RIMC/EE/2012-13

Dated 23rd June 2017

Entrance Examination for Admission to Class VIII in Rashtriya Indian Military College (RIMC), Dehradun, for July 2018 term will be conducted on 1st (Friday) and 2nd (Saturday) December 2017.

- Only Boys are eligible to apply for admission to the RIMC, Dehradun. Candidates appearing for the above test should not be less than 11½ years (eleven and half) in age but should not have been attained the age of 13 years as on 01 July 2018 i.e they should not be born earlier than 2nd July 2005 and not later than 1st January 2007.
- Candidates should either be studying in Class VII or pass Class VII from any recognized school at the time of admission to the RIMC i.e 1st July 2018.
- The written part of the examination will consist of three papers namely English and Mathematics on 1st Dec 2017 and General Knowledge on 2nd Dec 2017. The Oral interview will be held for only those candidates who qualify in the written Exam and the date for interview will be intimated to them by first week of March 2018.
- Application form and Prospectus and Old Question Papers can be obtained by speed post by sending a written request with an account payee Bank Demand Draft of Rs. 600/- for General Candidates and Rs. 555/- for ST /SC candidates along with caste certificate. The Demand Draft will be made in favour of THE COMMANDANT, RIMC DEHRADUN, DRAWEE BRANCH, STATE BANK OF INDIA, TEL BHAVAN, DEHRADUN, (BANK CODE-01576) UTTARKHAND.
- Application forms along with three Passport size photograph should reach the **DIRECTORATE OF SCHOOL EDUCATION** on or before 30th September 2017 Certificate of age (In duplicate) from the school record or Municipal Board should be submitted along with the application.

(SMITA SARANGI)
Principal Director

Issued by: DIPR

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND : KOHIMA

NO.DET-2/14/2001/PT-1/472

Dated Kohima, the 23rd June 2017

CORRINGENDUM ADVERTISEMENT

In partial modification to our Advertisement No. NO.DET-2/14/2001/PT-1/394 dated 2nd June 2017, the minimum entry qualification of Trade-Sewing Technology is hereby changed to Class 8th Passed. As per the table shown below :

SESSION : AUGUST 2017 - JULY 2018

Non- Engineering Trades.				
Sl.No	TRADES	DURATION OF COURSE	MINIMUM EDUCATIONAL QUALIFICATION	NAME OF GOVT ITIs
1.	Sewing Technology	1 year	8 th Passed	Dimapur.

NOTE : All the other terms and conditions remain the same.

Sd/-
(MUTHINGNYUBA SANGTAM)
Director
Employment, Skill Development & Entrepreneurship
Nagaland, Kohima.

Issued by: DIPR

Tsürabur asür Jongpongliba Lkr (Akhoya)
Bilemteter (24.6.07 - 24.6.2017)



Ochi yimyimer obala **Jongpongliba Lkr.** (Akhoya) iba ayanger lima nung arishi küm 103 tashi jajar külen Kodak tebu kidangi aoba anogo nung kodaker mepet tongshi ali tashi alua len ania kodaker züngsem nung tenogo. Kodak sensoli tenüing züluba longpak nung obala tenüing zülüoker küm 10 tashi renteta aruaka obala mebileteti anogo ka danga süitema meyoker. Obala iba akümlü nung alidang chinur aser semchi-semnurtem ajak moatsür ogo.

Tanü iba temoatsü nung onok pelar. Obala tsüngnep, temeim jakla aser tanen makai sarasademba ola onok molungjang nung teti asoshi ajenloka lir. Tanü onoki na kanga menungraseta iba molungnen o zülür.

Tatem maka tepeladak kenü na ajurutsü.

*Temeim Chirnur, Semchisemnurtem
aser nai meimertem ajak.*

KOHIMA LAW COLLEGE
RAJ BHAVAN ROAD, KOHIMA.
LL.B ADMISSION OPEN 2017

For more information on admission and other queries contact Kohima Law College during office hours (10:00 AM - 2:00 PM).

Phone : 9615608958, 9856881691

Limited hostel seats available for boys & girls.

MOPUNGCHUKET AIT LAISHIR TELONGJEM
KOHIMA (MALT)

SEMINAR ON CAREER GUIDANCE AND EMPLOYMENT OPPORTUNITIES
SPONSORED BY MOPUNGCHUKET SENSO TELONGJEM KOHIMA
AND

AO TEMOLUNGTSÜR TELONGJEM KOHIMA

Date : 27th June, 2017

Venue : J.M.C. Lerie Colony, Kohima

Moderator : Dr. M. Temjen Longkimeer

- 8:00 - 8:30 AM : Registration & Breakfast
- 8:30 - 8:50 AM : Introduction : Mr. N. Wapang Jamir
Treasurer, MALT Kohima
- 8:50 - 9:30 AM : God Honouring Youth :
Mr. Temjenmongba Sempo
Pastor, KABA
- 9:30 - 11:00 AM : Employment opportunities :
Mr. Lezo Putsure, Director YouthNet
Nagaland
- 11:00 - 11:30 AM : Break & Recreation
- 11:30 - 1:00 PM : Group A : Career Guidance :
Mr. Renthungao Odyuo,
Asst. Professor
Japfü Christian College, Kohima
Group B : Preparation for Competitive exam.
Mr. Temsuchuba Jamir, EAC,
Govt. of Nagaland
- 1:00 - 2:00 PM : Lunch
- 2:00 - 3:00 PM : Self Reliance : Mr. Ben Imchen Director
Colosseum Tech Solution Private Ltd.
- 3:00 - 3:40 PM : Surrendering to God in making important
Decision in life : Mr. Temjenmongba Sempo
Pastor KABA
- 3:40 - 5:00 PM : Back to the roots

*"May God's blessing continue to shower upon the
Mopungchukians for generation to come"*

Confederation Cup 2017 nung Sanchez-i otsü yanglu



June 23 : Alexis Sanchez Germany den asayadang Chile atema goal agütsür sülen tangokba noksa nung angur.

Kazan, June 23 (Agencies): Brehostibarnü Confederation Cup nung Chile aser Germany tsüingda asayaba nung telok anaprong nungi goal kaka agütsü saka iba asaya nung Arsenal nungi asayar, Alexis Sanchez-i otsü tasen ka yanglutet. Iba asaya

nung Chile telok nungi Sanchez-i goal ka agütsütetba ajanga par linük nungi international asaya nung goal timba agütsüteter kümogo.

Sanchez-i Chile tenüing nung asayaba nung Germany den asayadang agütsütetba ya densema goal 38 agütsütet.

"Chile nung rongnung goal timba agütsüsang akümba ajanga ni kanga pelar, iba asayamong akoktsü ya onok nükjidong lir aser onoki akoktsü amai bilemer," ta Sanchez-i asaya temer osangbener den jembidang ashi.

Iba asaya nung Germany telok nungi Lars Stindl-i goal ka agütsütetba telok ana tsüingda goal kasasa aküm.

Chile aser Germany tsüingda asayaba sülen Group B nung Chile ya temaba jenjang tongtetogo. Iba Group nung Chile aser Germany telok ya points pezü-zü lir saka goal agütsüba asadanga nung Chile temaba jenjang nung lir. Kasa group nung Australia aser Cameroon telok points asem-sem nung lir.

Deobarnü Germany aser Cameroon tsüingda Sochi nung asayatsü, aser Moscow nung Chile aser Australia asayatsü.

Hamirpur nung Himachal Olympic

Hamirpur, June 23 (Agencies): Himachal Pradesh lipok otsü nung saisapong sentong tulutiba 'Himachal Olympic' Hokulbarnü nungi Hamirpur nung tenzükogo aser iba asayamong nung Himachal Pradesh kübok district 11 nungi asayartemi shilem agitar.

Iba sentong tulu ya Wrestler tejen, Master Chandgi Ram Ji'er jabaso aser International Wrestler, Jagdish Kaliraman-i lapoktsü.

Sultan film nung Jagdish Kaliraman ya Salman Khan

indang coach amai shilem agia lir. Iba asayamong ya Himachal Pradesh Olympic Association (HPOA)-i ayongzük aser HPOA tir, Anurag Thakur, MP (Lok Sabha)-i asatetba sentong ka lir.

Athletes nung takok angurtem nem Kaliraman ajanga sempet agütsü. Himachal Olympic ya sentong tulu ka lir. Anurag Thakur-i iba sentong kanga junga atongtetogo, ta iba sentong nung jembidang Kaliraman-i ashi.

Linük nung yimden

asaya tenzükogo

yimsüsürtemi Anurag Thakur dak nungi angazüktsü aika lir. Pai cricket nung kisüing masü saka saisapong ajanga atema kiojen teperi achayanga yanglutsüogo, ta Kaliraman-isa shisem.

Iba asayamong nung Hockey, Athletics, Boxing, Basketball, Judo, Kabaddi, Volleyball, Wrestling, Kho-Kho, Weight Lifting aser Shooting nung asayartemi tokteptsü. Iba asayamong ya inter-district format nung asayatsü aser International Olympic Games ama asayatsü.

Srikanth-i Praneeth kokogo; Saina o Sindhu tsükogo



Australian Badminton Open, Sydney Olympic Park nung Kidambi Srikanth asayaba mapang tangokba yangi noksa nung angur.

Sydney, June 23 (Agencies): Australian Open Super Series badminton asaya quarter-final nung Kidambi Srikanth-i külem India nung asayar Sai Praneeth madak 25-23, 21-17 agi takok nguogo.

Tenaprongla ya Gopichand kübok academy kasa nung dang train süa liasü. Iba asaya mezüingbuba set nungbo tie breaker asayar ang Srikanth-i koktet.

Srikanth-i mezüing set akokba ajanga pa sasa dak

temolung lemteta, tanabuba set kanga jung asayateta pai akok. Srikanth iba asaya akokba ajanga semifinal tongtetogo.

Kasa asayamong tetsür asaya nung P.V Sindhu quarter-final nung Chinese Taipei tsür World No.1 Tai-Tzu Ying-i tsükdaktsüogo. Sindhu 10-21, 22-20, 21-16 agi tamakok angu.

Asaya mezüingbuba set nungbo Sindhu-i 21-10 ta ayong ayonga akok saka tanüingba asaya ana nung Tai-Tzu Ying-i kanga jung asayateta lai iba

asaya akok.

Tetsürtem kicha asaya tanga ka nung London Olympics bronze medallist Saina Nehwal-a quarter-final nung tsükogo. La China tsür Sun Yu-i 21-17, 10-21, 21-17 agi kokogo. Iba asaya ghonda ka ser minute 19 asayaa liasü. Sun Yu taruba asaya Nozomi Okuhara den asayatsü shibai külem Japan tsür Sayaka Takahashi koka liasü. Saina tamakok anguba ajang iba asayamong nung India tsür ajak tsükadokogo.

Zero Boys A aser Brotherhood CC-i kokogo

Dimapur, June 23 (TYO): MDCA Inter Club T20 Cricket Tournament nung Zero Boys A telok nungi Bendangtemsüi run 29 yanglua par telok-i Jovial telok kokogo. Run 119 arishiba nung ball 6 anunga lia parnoki iba asaya akok.

Zero Boys A puri toss akokba sülen mezüing ball anotsü asoshi shimtet aser parnoki over 20 nung Jovial pur wicket 8 tugudaktsür run 118 yangludaktsü. Parnok rongnungi Bendangtemsüi run 20 zükdaktsür wicket 3 agi aser Tekatemsüia run 23 zükdaktsür wicket 2 agi. Jovial pur rongnungi Temjentoshi run 33 yanglu aser Meyamereni run 26 yanglu.

Run 119 arishi tenzükba nung Zero Boys A puri junga tenzük saka teyong nung wicket kar kara out asüba ajanga asaya kanga jangratemsüka kumdaktsü.

Ajisüaka Bendangtemsüi kanga junga asayateta run 29 yangluba ajanga par teloki akok. Maneni par telok rongnung Mangyangtekaia run 27 yanglu koba nung pai four ana aser six ka azük. Jovial club nungi Moalemba wicket 2 agi aser Odiyanger aser Jangzapong

nati wicket kaka agi. Tanabuba asaya nung Brotherhood CC-i wicket 7 agi ball 33 anunga lia Gorkha Student Union madak takok angu.

Brotherhood CC nungi asayar Daniel Rai out mesüi run 30 yanglu aser Aoshashi-i run 23 yanglu. Buddha Rai-i wicket ana agi aser Bir Bahadur-i wicket ka agi.

Asaya nung Gorkha Student Union pur mezüing batting asü aser opener temi kanga junga asayaa over 10 nung run 78 yanglu. Ajisüaka Sunil Gurung shibai run 21 yanglu, pa out asüba sülen nungi GSU pur out asü tenzük. Parnok rongnungi Nihal Rai run 61 yanglua pai dang junga asayatet. GSU puri over 20 nung wicket 6 out sür run 110 yanglutet.

Brotherhood pur rongnungi Tamsutoshi aser Longkhum nati wicket anana agi.

Hombar nü asaya taoba küm final asayar Sovran CC aser Titans CC na asayatsü.

Hombarnü asaya yamai alitsü: 8:00 AM - Titans CC Vs Sovran CC 11:30 AM - Rainbow CC Vs Jovial CC

Liverpool-i Mohamed Salah alizükogo


Liverpool, June 23 (Agencies): Liverpool-i Brehostibarnü Egyptian winger Mohamed Salah AS Roma nungi alizükba maparen tembangogo. Osang ajanga ashiba pa euro million 39 (million \$43.5) yong alizük.

Arishi küm 25 tain asayar yagi Liverpool den küm 5 atema contract ka yangluogo.

Salah taoba mapang nung Basel, Chelsea aser Fiorentina nungi asayaa liasü. Pa Roma nunga season ana tashi asayaogo aser iba mapang nung pai Serie A nung 65 ben asayaba nung goal 29 agütsü.

"Ni iba cluba nung densema atema kanga pelar. Ni akokba tajungtiba agi club atema inyaktsü. Ni club atema langka bo sa kokner," ta Salah-i ashi.

Salah ya Liverpool puri



Mohamed Salah

mapang talang ka nungi aginüa liasü, parnoki küm asem tejakdanga pa khen alitsü asoshi merangogo.

NDA den tesentaktep... (Tapak 1 nungi...)

"Pei tajangzük angutsü atema tenük mesepshi nung party ka dang nungi ka dangi meyiper lenirtemi NPF party indang tangatetbatem nung tasüingdanga makatsüla, kechiyong iba party-i state jenjang anguba mapang nungi regional atema inyaker," ta kasa sangdong nungsa ashi.

"NPF-i Congress party aser

party Tir dang nenshia ya metetdaktsür, NPF ya NDA teloktep partner ka lir anungji maneni teloktep tangatetba sülen anidaktsü, aser aitsür shia nem telangzüba magütsütsü, ajisüaka nüburtem tesünep, terenlok aser azükaru lenmang nung tejakleni anitsü," ta NPF Central Office, Media & Press Bureau-isa metetdaktsü.

BILEM DANGANG

"Temolungsentsü agi aitsüra nangzüktsü nüngdaker".